

UNSER KERCH !

von Else Hanf

Zum Inbegriff vum Wort ‚Dehoam‘
g'hört, seitdem ich denke kann,
"unser Kerch". Ma hot des Gefühl,
dass ihr's "do" gefällt
in unserm kloane bißl Welt
in Hüttefeld.

E neie Kerch - fa uns elloa
Es fängt e neies Lewe oa
genaa vor 75 Johr.
... ich stell die Zeit mea nochmol vor:

Die Kerch lädt oi grad allmitnanner !
Ma sieht dann kumme nochenanner:
Die Kerchevorständ, wu ma hott,
all im schwarze Kercherock.
Vun jedem Haus - des war zu seh
henn oans, zwaa in die Kerch zu geh.
De Platz fa Fraue war –
annerscht wie heit
weg vun de Männer
uff de annere Seit.

Zylinder hot's gewe
beim Hochzig mache
Sparsam geht ma um mim Lache,
bewegt sich gemesse
der Würde zulieb
... .. wann oaner dann oischläft,

dann war er halt müd !

Net sou's Barons!

Symbolisch - als Danke
e Kerchebank vorne.

Elloa fa's Barons'

hot se do gstanne.

Mit me vornehme Türche,

Sitz - un Fußkisse noch

aus Samt, s'hot reich ausgesehn

des waaß ich noch.

All warn mea stolz

uff unsern Baron

immer - in jeder Situation.

Die Kerch war sou richtig nooch unserm Sinn

.... richtig heilig innedrin.

Debei war glei vun Oafang oa

e Kinnerschul glei newedroa !

Des heeßt, sou manches Bibelwort

is uns vertraut - seit domols dort.

Erinnerunge - ma muss lache -,

wu oam heit noch glücklich mache.

Nooch üwer 70 Johr sogar,

waaß ma gena

wie's domols war.

Überzeugend lieb und nett war

unser Schwester Lisabeth.

Mit schöner weißer Schwesternhaub

henn mea se geliebt !

(ich hebb se oamol "uhne" gesehn

... ihr Ohrn henn mich betrübt !)

's gäb noch viel zu verzähle
vun "Früher" - vun "Heit".

Vor gar net allzulanger Zeit

's war net sou arg vun ungefähr

- bei uns schießt öfter oaner quer !!
doch des warn "ausgespröche" Posse,
dass ma ins Kerchfenschter g'schosse.
Im Fenschter sieht ma des is wohr,
de Paulus stehn - seit Tag un Johr.
Dem fange oa die Knie zu zittern,
die Butzescheibe tun versplittern,
soin rourer Rock, der geht verrisse,
beinoh heet er's Schwert hiegschmisse.
Selbscht dem Herr Parre in de Kerch,
war's wie noch nie sou üwerzwerch.
Er hot koa Zeit meh g'hatt - zu wisse,
ob er heet Angscht hoa derffe müsse.
Er schreibt empört drum - vun de Hütt:
"Herr Bischoff ! Ich teil Ihne mit:
Do wird ma doch - ich bin verdrosse,
ums Hoar - vun de Kanzel gschosse."

Die Kerch denkt dodruffhie fa sich:

"Die Hüttemer, die brauche mich.

Fa alle Zeite - ganz bestimmt !

Do bin ich richtig - u'bedingt !

's wird koaner meh dann üwwerzwerch!

Gott sei Dank!" - denkt dann die Kerch

"Do bin ich glücklich - meiner Drei

do will ich bleiwe -will ich soi !!!"

Eia Kerch